

**Komunikadu Imprensa
Períodu 23 Fevereiru 2017**

**Estudante Ensinu Sekundariu Jerál 1912 Same primeira-vez simu
treinamentu kona-ba papel jenéru no kazu krime sira ho natureza seksuál
relevantes sira iha lei penal aplikável**

Iha 15 Fevereiru 2017, JSMP hala'o treinamentu ba estudante Ensinu Sekundáriu Jeral 1912, Sub-distritu Same, Distritu Manufahi. Treinamentu ne'e partisipa hosi estudante *désimu-anu* (ensinu sekundáriu klase 1) ne'ebé kompostu hosi feto nain 22 no mane nain 8.

Treinamentu ne'e ho objetivu atu hasa'e koñesimentu estudante sira nian kona-ba direitu labarik no direitu feto, konseitu jeral kona-ba Lei Kontra Violénsia Domestika, violasaun seksuál no abuzu seksuál ba menór inklui asesu ba justisa formal.

“Treinamentu ne'e importante atu bele sai hanesan referensia ba estudante sira-nia koñesimentu adisionál atu eveita sira hosi poténsia ba krime hirak ne'e,” dehan Luis de Oliveira Sampaio, Diretor Ezekutivu JSMP.

JSMP deskobre katak maioria kazu sira envolve labarik no lori ona ba Tribunál, kuaze hatudu katak labarik sira laiha koñesimentu kona-ba situasaun hirak ne'e, no bainhira krime hirak ne'e akontese, sira labele buka dalan apropiadu atu trata sira-nia kazu.

Reprezentante Diretor Ensinu Sekundáriu Jeral 1912 Same, Sr. Carlito Belo, iha nia abertura husu ba estudante sira atu bele aproveita treinamentu ne'e ho didiak. Aleinde ne'e Sr. Belo mós rekoñese katak desde eskola ne'e hari'i seidauk iha organizasaun ruma mak fó treinamentu iha sira nia eskola. Nia mós subliña liu tan katak tópiku ida ne'e relevante tanba iha kurikúlu ensinu eskolar atual laiha matéria espesifiku ruma ne'ebé koalia kona-ba asuntu ne'e.

Durante treinamentu, estudante sira fo atensaun masimu ba iha prosidementu legal ba labarik ne'ebé konflitu ho lei, kazu violénsia doméstica, kazu abuzu seksuál ba menór no klasifikasiuna kona-ba saida kona-ba krime público no semi público.

Treinamentu ida ne'e realiza tanba apoiu finanseiru hosi Embaixada Canada, Jakarta-Indonézia.

Atu hetan informasaun kle'an liu tan favór kontaktu:

Luis de Oliveira Sampaio

Diretor Ezekutivu JSMP

luis@jsmp.tl